

Tuesday, February 18, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT



NITI AAYOG ADP RANKING

Ramchhunga District hnufual chawikanna tura duan NITI Aayog Aspirational District Program ah Mizorama Mamit District chu Financial Inclusion leh Skill Development huanga ti tha bera thlan a ni.

National Institution for Transforming India (NITI Aayog) hian nimin piah khan Aspirational District Program hnuaia ramchhunga District ti tha 36 an tarlang a, Mizoram atangin Mamit District chu Mitin huap sum leh pai lama hmasawna – Financial Inclusion leh Eizawng tura thiamna – Skill Development lama hmasawna kawngah ti tha ber a ni a, hemi lawmman atan hian cheng vbch 3 a keng tel dawn a ni.

NITI Aayog in ramchhunga state 16-a District ti tha a puan zingah hian hmarchhak atangin Mizoram chu a lang awmchun a ni a, Aspirational District Program hnuaiah hian intihsiakna hrang hrang awmin hriselna dinhmun, lo neia eizawna, mipui hmasawna leh zirlan lama hmasawna bakah Mamit District in lawmman a dawnna mitin huap sum leh pai lama hmasawna leh eizawng tura thiamna te a tel a, heng bakah hian intihsiakna hrang hrang a awm bawk.



ASSEMBLY

Naktuk atanga tan tur Mizoram Legislative Assembly inkhawm (budget session) atan sorkar dan siam tura duan thar pathum a lut tawh a, heng zingah hian Higher & Technical Education Department atanga theh lut Mizoram state University Bill a tel.

Assembly Secretariat atanga thudawn danin Mizoram state University Bill bakah hian sawrkar dan siam tura duan thar LESDE atangin The Mizoram Private Placement Agencies (Regulation) Bill, 2025 leh UD&PA atangin The Mizoram Urban & Regional Development Bill, 2025 te thehluh a ni tawh a, He'ng bill pathum bakah hian Finance department atangin dan siamthat tur The Mizoram Goods & Service Tax (First Amendment) Bill, 2025 chu thehluh a ni tawh bawk.

Official Resolution pakhat lut tawhin, heihi environment, forests & climate change minister Pu Lalthansanga'n assembly pawmpui tura a putluh tur a nih thu dawn a ni a. Hei hi Parliament-in dan a lo pawm tawh “The Water (Prevention & Control of Pollution) Act” Mizoram assembly in a lo pawmpui (ratify) vena tur ni a thu dawn a ni. Mimal thehluh (private resolution) 85 a lut tawh a. Zirtawpni hi Private member-te puala hun hman thin a nih lai-in tun assembly session-ah hian Zirtawpni vawi khat February ni 21 bak chu Zirtawpni apiang chawlh a nih dawn avangin hun a awm dawn lova. February ni 21-ah pawh hian Prime Minister hlui Dr. Manmohan Singh sunna hun bakah larsap thusawi lawmthu sawina motion sawiho ni tur a nih dawn avangin hun a tlem hle dawn a ni.

Zawhna hi House chhunga chhan chi (starred question) 817 leh ziaka chhan chi (unstarred question) 96 a lut tawh a. House dawhkana dah tur lehkha

pawimawh 5 a lut tawh bawk. Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei hi budget a vawi 2 pharhna tur a ni.



CHAPCHAR KUT

Art and Culture Department bultumin kumin Chapchar Kut chu Aizawl bakah District headquarters zawng zawngah leh rampawna Mizoram House ah hman a ni dawn a, thupui atan Hawihhawmna a ni ang.

Art & Culture Minister Pu C. Lalsawivunga’n kumin Chapchar Kut hmang turin zo hnahthlak hmun hrang hranga awm a sawm a, Chapchar Kut chu Aizawl bakah District zawng zawng leh rampawna Mizoram house ah hman a ni dawn tih a sawi.

Pu C. Lalsawivunga chuan Art & Culture Department bultumin Chapchar Kut chu hmun hrang hrangah pui thei ang berin hman a ni dawn a ti a, Chapchar Kut thupui Hawihhawmna chu Mizo hnam ziarang ropui tak, khawtlang nun leh inlaichinna ah bet tlat a ni a, he kut hmang hian he ze ropui tak hi chawi sana a awm theih nan mi zawng zawng tel turin a sawm a ni.

January ni 16-a Chief Minister Pu Lalduhoma kaihhruaia Chapchar Kut organising committee thukhawm chuan kumin Chapchar Kut thupui atan "Zo nun ze mawi - Hawihhawmna" tih chu an thlang a, Chapchar Kut hmanna pui ber chu Aizawl lammualah March ni 6 leh ni 7 ah neih tura duan a ni a. Ni 6 ni hian Home Minister Pu K. Sapdanga chu khuallian a ni ang a, ni 7 niah Chief Minister Pu Lalduhoma khuallian a ni dawn a, Kut puala programme pawimawh dang chu March ni 3 atanga kalpui tan tur a ni.

March ni 3 ah hian Chapchar Kut pual Tlan (Kut Run) buatsaih a ni dawn a, ni 4 ah Flower Show leh Painting & Exhibition Show kalpui tan tura ruahman niin March ni 5 ah Chapchar Kut heritage tour buat a ni ang a, he mi ni vek hian Falkawn Zokhuaah Mizo Pi leh pute Nun tarlanna hun buatsaih tan a ni dawn a. A tuk ni 6-ah pawh neih chhunzawm tur niin Ni 5 ah vek hian Kut pual Handloom, Textile & Handicraft Exhibition and Food Processing & Food Court hawn a ni ang a, exhibition & food court hian ni 7 thleng a awh dawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



MALARIA

Mizoramah nikum chhungin Malaria vei mi 16,899 an awm a, mi 7 in nunna chan in Dengue vei hmuhchhuah mi 744 an awm bawk.

He thu hi vawiina H&FW Department hnuai a National Vector Borne Disease Control Programme (NVBDCP) State Review Meeting ah tarlan niin nikum chhunga Malaria vei mi 16,899 zinga mi 8950 te chu Malaria PF an ni a, Malaria vang hian mi 7 in nunna an chan a, nikum chhung khan kumdang zawng aain Malaria PV a pung nia report niin Chikungunya vei hmuhchhuah mi 3 report an ni bawk.

Thutkhawma tarlan danin Mizoram ah District 4 - Lawngtlai, Lunglei, Mamit leh Siaha District chu Malaria tam zual bikna an nih thu tarlan a ni a, International Border – Bangladesh leh Myanmar ramri hrul ah Malaria hi a tam zual nia report a ni bawk.

Dr Hmingthanmawii Director of Health Services chuan natna laka invenna kawnga sawrkar hmalakna hrang hrangte tha taka kalpui mek a nih thu a sawi a, Mizoram chu India ram state hrang hrang zinga Malaria tam na ber state a nih thu leh thawktuten an awmna hmun theuh ah theihtawp an chhuah a tul thu a sawi bawk.

NVBDCP hnuaiah hian malaria natna laka invenna thosilen damdawia chiahsa sem te, thosilen pangngai damdawia chiah sak te leh chenna inchhung thosi hlo a kah te kalpui a ni.

